

AB

44 $\frac{9}{i,13}$



1. Dytenberger s. Joh. / unter
 anweisung, ein mann Gütlich
 seligen anuption soll,
 1529.
2. Haren s. Conr. / gesvauß
 Jos. mit Petro, 1561.
3. Matshidler s. Georg of Arnd
 Sylvii, vnda von Franck
 glück, in tontsion
 swimm, 1539

3.
Eneas Silvius :

darnach Papst Pius Secun-
dus genand / Der gelerts al-
ler Bepst / sagt von Frawen gluck / Wie sie
manchen vnuerdienten menschen / so
bald als den besten erhöhet / inn
Deutsch Keim gefast
durch

Georgen Wotschidler.

Das Papstum gwislich manche jar /
Gesündigt hat gantz offenbar.
Vider Gott / vnd sein heilig wort /
Daraus gefolgt so manich mord.
Dem glück es wol gefallen hat /
Nu stet es auff dem letzten grad.
Befert sichs nicht / vnd thut bald bus /
Ewig es gwis verderben mus.

Faint, illegible text at the top of the page, possibly a title or header.

Several lines of faint, illegible text in the upper middle section of the page.

A single line of faint, illegible text.

A block of faint, illegible text in the lower middle section of the page.



Dem Edlen vnd Vheften /
Curfürstlicher durchleuchtigkeit / zu Sach-
sen / Land / vnd Oberzeugmeister / Friderich
en von der Brun / Wundschich Georg
Wotschidler Buchsemeister /
Gottes gnad vnd
seligkeit .



Eist nimmer kein
Geschlecht / noch Stam /
so hochwichtig / so gut /
noch Edel / es wird zu zeit-
ten vntugent darin gespürt
Desgleichen kein Stam /
stant oder ampt / so wurms-
stichig / es wird etwa vnter
vielen einer eins erbarn / dapffern / vnd stand-
hafftigen gemüts gefunden / wie denn das
alle Historias vol / vnd inn allen Croniken
wol zubeweisen stehet etc. Also auch Edler
vhester Juncker / hab ich (dieweil ich nicht
viel zuschaffen) fur ein müßigen / fur mich
genommen / ein Büchlein (so vor zeiten Kei-
serlicher Maiestat Sigmundis Cantzler)
Eneas Siluius genant gemacht / darin er
meldet von Frawen glück / irer freundschaft
vnd feindschaft / glücks vnd widerglücks /
durch die leng beschrieben / vnd dieweil das
an jm selber ein fein lustig lesen vnd gedicht /
vnd

vnd doch trawm weis / des glücks art vnd
eigenschafft / durch viel bewerter Exempel
grosser herrn vnd Potentaten / mit warheit
anzeigt / auch die bösen mit den guten / von
glücks fahl hoch erhaben / meldet / Dabich
das / vmb kurtzes verstands willen / inn
Deudsch Keimen gefast / vnd nach dem ge-
melder Siluins / ein geleter / dapfferer / red-
sprecher Man / von des wegen im meniglich
gewegen / ist er letztlich zu dem Papstumb
komen / vnd Papst Pius Secundus genent
worden / darin er seines stands gütlich vnd
trewlich gewart / im wahn / als es gleich
Göttlich vnrecht wer / vnd wil glauben / wo
er itzt diese zeit der gnaden hett sollen erle-
ben / er hett sich selbs (durch erkantnis
der Göttlichen warheit) Bepstlichem ir-
thumb zu wider gesetzt / Dieweil aber das
glück in / als ein frome geleerte Person ge-
sehen / welchs doch bey den Bepsten nicht
gebreuchlich / viel weniger gesehen worden /
hat es im mit vngestümb begegnet / vnd
nach dem er dem Türcken zuweren / viel
volcks versamlet / ist er im zug tod blieben /
vnd gestorben (Etliche wollen / im sey ver-
geben worden) Damit er sich aber selbs der
warheit beschleust / inn diesem trawm vnd
gedicht / das glück inn trawm fragt : wie
lang es den leuten günstig sey / Antworts
Niemand lang / auff das sich auch nie-
mands

mands geschwinds zufal / des glücks vber=
nem / vnd zu gros darauff puch / hat er an=
derst inn seinem dichten nichts gemacht /
denn die Perschonen / so vor von grossen
glück erhaben / schnell wider inn vnglück ge=
fallen / des gleichen so von kleinem stand / et=
wo durch trewe handlung / etwo durch vn=
trew / zu grossen stand komen sind / behart
aber endlich darauff / es auch gewislich am
tag leid / das das glück dem behertzten mehr
denn dem verzagten zulegt / wie das bey den
Alten alle Historias vol / wie getrost sie sich
inn wichtigen vnd ferlichen sachen / gehal=
ten / vnd oft durch kleine macht grosse
hauffenerlegt / darzu gehören neben der erz=
farung gelesen sein / der Alten Historias / gu=
ter thaten vnd anschleg / wie denn die Fro=
tinus / Justinus vnd Dnexander / mit hauf=
fen melden / Vnd so ich sehen werd / das L.
D. dis mein schlegt mühe etwas gefellig /
wil ich / ob Gott wil / euch solcher Büch=
le eins Keimen weis / auch zuschreiben / L.
vheste wollen solchs nicht von künsten / son=
dern gutwillig von mir verstehen / dieweil
dis Büchlen meldet / das der / welche sich
inn auffrichtigen / redlichen tadten geübt
gehalten / namen mehr blue vnd wachs /
denn die sich zu grossen reichthumen vnd
herschafften getrungen / denn wie der Phi=
losophus von Thebis sagt / Das falsche
A ij vnd

vnd zergencliche reichthumber nicht mü-
gen erfüllen / was sey verheissen / auch nicht
lindern / sondern anzunden / den darfst nicht
vertreiben / die sorg / sondern beruffen / nicht
auffheben die durfftigkeit / sondern mehren /
vnd ist doch Edler Juncker / nichts so ge-
waltig / mechtig oder reich / das doch sich
bestands rhümen dorfft / wie sich denn Alex-
ander Manguus / vor dem König Dindimo
brechtigt macht / sagt im von grosse seiner
reichtumber vnd macht / aber Dindimus
verlachts / im sprach / was weistu / ob solche
macht sey lanwirig / mich vertreust zu erze-
len (sprach er) die mechtigen vnd gewaltig-
en / so inn kurtze zu vnmechtigen / auch et-
liche König / zu dienstparkeit der schande /
getrungen sein / Menschlicher auffsteigung
staffel sind schlipfferig vnd voller dorn / ein
schwancender gipffel / ein erschrecklicher
abfal / man steigt schwerlich auff die hohe /
sitzt da mit engsten / steigt darob schwerlich
vnd schnelliglich / welches also bezeugen /
nicht allein König / sondern grosse völker
vnd Königreich / Vnd inn Summa / so
bleibt vns nichts inn glück / oder widerwer-
tigkeit / nach vnserm sterben / denn ein guter
Nam / Wollet also vhester Juncker fur lieb
nemen / denn jr fur war (meins bedunckens)
nicht

nicht mit geringen Keren vñ Ampt versehen/
dazu nicht allein wissenschaftt / sondern be-
stendig gemut / rühmlicher tadl / die ich bey
Ewer vheste gewislich vnd tröstlich zu rhu-
men weis / befehl mich Ewer vheste / als
meim Oberherrn / vnd gunstigen Junckern
inn alle gunsten / Geben zu Wittemberg den
19 tag Apill. im jar M. D. xxxix.

E. D.

Unterdienstlicher

Georg Motschidler
Buchsemeister.

A Es ich eins nachts der rhwe pflag /
Vnd sich gewendet het der wag .
Noch oben on des himels ort /
Ich gedacht hieher / hin vnd dort.

Wiewunderlich were das gluck /
Versucht von mir / so wunder dick .
Gedacht inn mir / wie das das wer /
Manchem fromen so hart gefehr .
Derwider gedacht ich auch dabey /
Vnuerdintem es so gunstig sey .
Der doch zu tugent wer ein spot /
Ich gdacht inn mir / ach lieber Gott .
Wiltff mir doch aus gedanken schwer /
Ein harter schlaff der gieng mir her .
Inn dem mir fur kam ein gesicht /
Mit vreis zuschawen ich mich richt .
Inn dem mich daucht / wie das ich wer /
Auff einem grünen anger .
Mitten inn einem schonen Walt /
Ein grassigte Wisen wolgestalt .
Dadurch ein schones pechlin flus /
Mit Mawern vmbringt nach hertzens lust .
Zwu pforten dran furwar nicht klein /
Von Doren vnd von Helffenpein .
Die Mawern hoch von Diamant /
Der bach grundlos / on allen sant .
Kein strassen zu der pforten gieng /
Ein schlach bruck hoch on ketten hing .
Die man zu zeitten nider lies /
Welch bruffen warn / man einhin hies .

Das

Das zuweilen (doch selten) gschag /
Auff der andern seiten ich sitzen sag.
Ein grosse meng der Man vnd Frawen /
Mit grossen wunder thet ich schawen.
Auffrechten beide Weib vnd Man /
Die hend vber den Kopff zusam.
Baten mit seufftzen vnd begirn /
Wofften sich stetz nüber zufirn.
Als ich von dem erschrocken war /
Liff ich fast / vmb / hin vnd dar.
Als ich mich hin vnd wider went /
Kamen mir zu ansicht / viel der ich kent.
Was ursach aber ein ider het /
Das mich der keiner ansprechen thet.
Davon zusagen / weis ich kein wort /
Inn dem ich kam zur hurnen pfort.
Darob mit buchstaben ward gschrieben /
Ich las jr wenig / sind mir nicht bliebn.
Ich las der wenig / bhalt noch minder /
Weis nichts danon / seid vnd sunder.
So begirlich was mein beger /
Zuwissen / was doch drinnen wer.
Vergebens ich den Jüngling bat /
Der schlüssel zu der pforten hat.
Das er mir die wolte schliessen auff /
Inn dem sag ich ein grossen hauff.
Drunder ein schöner Jüngling war /
Mit sein hoffgsind auch komen dar.
Die gstat ich kant / west doch nicht wer /
Inn dem ich sach auch komen her.

B Aus

Aus Welschland ein geleter Man /
Der sprach mich als sein Landsman an.
Durch wunder fragt ich / wer der wer /
Der also köstlich kömpt daher.
Er sprach / der Man vom stammen hoch /
Ist Ludwig von Beirn / der Dertzog.
Ein Churfürst im heiligen Reich /
Der vns nein führen wird gleich.
Den bat ich sehr / vnd das er wolt
Der Landschafft gnissen lassen solt.
Das er mir helffen wolt hinein /
Er sagt mirs zu / bein ehren sein.
Inn dem nider gelassen war die pruck /
Bald ich mich vnter sein mantel duckt.
Der Pförtner ein iglichen nent /
Ich gdacht / wenn er dich nur nicht kent.
Also ich vnter dem Mantel sein /
Heimlich verborgen kam hinein.
Da sach ich schon Blumreiche Wisn /
Die Bech von Wein / vnd Milch her flisn.
Frische Weiher / kalte Brunnen /
Lüstige Bad / inn milter Sonnen.
Grosse Weld / mit treublen beladen /
Obstreiche Beum / om külen schatten
Die Bech flossen von Medt / vnd Wein /
Als Disperidum / Pheacium gwest sein.
Von Opffeln / was ein süßer geschmack /
Als ich gerochen hab mein tag.
Inn Welden zames Wilpret liff /
Die fischlen zam inn quellen diff.

Als inn der Insel inn Mores land /
Eliotrapeza ist sie es gnannd.
Der selben gegent sein hie viel /
Der ich eins teils hie nennen wil.
Viel wunder disch wurden gedeckt /
Vnter den Beumen / mit Golt vmblegt.
Trinckgeschir / von Silber vnd Golt /
Was man auff erden wünschens solt.
Ein lebendigr felschs gebirt den Wein /
Auff erden mag er nicht besser sein.
Honig allenthalben fleust /
Der Zucker aus Kören scheinest.
Die Beumen / alda allenthalben /
Fließen mit woltschmeckender Salbn.
Auch find man on den Berglen Klein /
Von Golt vnd Silber grosse stein.
Das Wiltbret man ein ider Birschen /
An Beumen hangn / wie die Kirschen /
Perlen / vnd auch edel gestein /
Auch hübsche Jungkfraw gros vnd Klein.
Auch wolgeschaffne Jüngeling /
All seittenspiel / man da hört kling.
Die dantzten stetigs auff vnd ab /
Glaub nicht / das Mahamut doch hab.
Versprochen / die seins glauben sein /
Solch Paradeis / nach diesem schein.
Kuchemeister / vnd auch Kelter /
Die lieffen eilends hin vnd her.
Warden Bacchus / Ceres vnd Venus.
Die Trugen / speis / Wein vberflus.

B ij Nicht

Nicht weit ein Weldlein davon lag /
Darin man freudt / vnd bultschafft pflag.
Der sich noch dem wind stett pog /
Vntern mantel ich furher frog.
Ging frölich vnd mit freuden her /
Begegnet mir on als gener.
Veginus / der gros Poet /
Wie grosse freud er mit mir het.
Als er mich het bey jm vernomen /
Enea: wie bistu hierein komen.
Sagt er zu mir dem zeigt ich on /
Das er mich nicht solt meiten thun.
Der sagt mirs zu / sprach so das bgerst /
Wolt das du rein beruffen werst.
Denn hie mag niemand bleiben stan /
Die Fürstin hab jm denn ruffen lan.
Wo dich denn die wird werden inn
Das du also bist komen rin.
Wird sie dich inn vngdult thun fragn /
Mit schanden wider naus jagen.
Ich fragt: wer mag denn die Fürstin sein /
Durch die man denn / mus komen rein.
Er antwort mir da alzuhant /
Die Fürstin ist frawgluck genant.
Durch die wir all hierin thun leben /
Die vns all freudt lust thut geben.
All welt die ist ir vnderthan /
Was sie wil haben / das geschicht schon.
Ich fraget in / so bistu der /
Der vor so arm / kom hieher.

Er sprach

Er sprach / sie hat mich auserkorn /
Fraw glück die ist mir günstig worden.
Dazu hat sie mein sach bedacht /
Vnd mir den Papst auch gnedig gmacht.
Das er mir inn dem minster sein /
Ein Thumbherr pfrund hat geben ein.
Ich antwort im mit worten gschwind /
Möcht ich denn auch nicht gnad find.
Das ich mich jr macht vnterthan /
Dieweil sie manchen fromen man.
Aus gnaden auch erhöhet hat /
Vielleicht ich komen möcht zu gnad.
Ich hab jr oft schmeltlich gered /
Das sie den bösen furderung thet.
Dargegn den fromen gar veracht /
Das hat mich oft vnlüstig gmacht.
Was hat Socrates arges gdacht /
Wenn hat fraw glück in angelacht.
Platoni war sie gar gefahr /
Zuletzt er doch ein dienstknecht war.
Dn Pitagore / war sie verzagt /
Im land den hin vnd wider jagt.
Was hat gthan Cicero / der from /
Den sie so schendlich lies komen vmb.
Mit grossen wurden sie in erost /
Der sin zuletzt gar entblost.
Scipionem hat sie inns elent gschickt /
Fabricium / seer mit armut gefickt.
Catonem / seer mit armut genot /
Den jungen macht / das er sich töd.

2 ist Suera

Zuerzelen wer es wil zulang /
Was hat jr Nero gthan zudancf.
Der vntatten thet er doch zuviel /
Viel grausamer denn ein Crocodil.
Was lasters Tiberius vbet /
Noch warns von deiner Frawen geliebt.
Domicianus /hoch inn freuden schwebt /
Vnd doch der Welt zur zerstörung lebt.
Dem den Fraw lang huldet /
Sein Regiment lang geduldet.
Cristemus /mit allen lastern beladen /
Vnul thet Posides /auch schaden.
Dagegen sich du Titum on /
Vespasianus /was het der fur lon.
Iouinianus /war mit Rauch erstecft /
Von dem viel tugent ward gehecft.
Von Cremona Gabrino /hast gehort /
Der seiner Herrn sieben ermort.
Als er die that begangen het /
Wurff er sie bald inn das priuet.
Der bösen that ward da nicht gacht /
Der herschafft /sich zum herrn macht.
Das mag in Gott nu als vergeben /
Wieviel sind der /die noch leben.
Du kennst den Ditzthumb von Paris ?
Wieviel sich der auch tugent flis.
Als der Scharpion vnd Otter /
Der Hertzog Philipssen Vater.
Von Purgundien /on alle schuld /
Inn vngnaden vnd vnhuld.

Brache

Bracht in durch vntrewwe sein /
Das er must leiden todtes pein.
Wiewol er im lies gleich zusagn /
Noch lies er in den kopff abschlag'n.
Von Franckreich / er den König bered /
Das er jms gleich auff sagen thet.
Das hat dem Fraw im als erlaubt
Mit Reichthumb hoch in wol begabt.
Dazu so hat sie im auch geben /
Niel schöner erben / ein gerhwig leben.
Nicht angesehen hat die that /
Das er ein mord begangen hat.
Wie mördlich er sich hat gerochen /
Am fromen Fürsten / gleich gebrochen.
Solche ding so gar mit hauffen /
Macht mir die gall vberlauffen.
Dieweil dem Frawe auch bisweil /
Den fromen gerten gibt jr theil.
Den fromen / sag ich / nicht ist gfehr /
Bin ich des / als der leidlicher.
Achte nicht das du auch allein /
Aus der zal der fromen wirst sein.
Vnd so du hast gnad der Frawen /
Für mich das ich sie möcht schawen.
Vegius sprach / viel biderlent /
Inn dieser samlung / ich dir bedent.
Sich Keiser Constantium an /
Empfing Nerua Troianus nicht lon.
Von meiner Frawen der fromen /
Zu was grossen stands sind doch korn.
Die man

Die Man die zwen Geodosien nent /
Wastu Keiser Augustum kent.
Was der fur glück nimpt mich nit wundr /
Von lebendigen sag ich dir besunder.
Dem Keiser gibt sie sone zeit /
Was glücks auff's Papsts seiten leid.
Was hat anderst dem König werd /
Von Arragania glück beschert.
Dem Fray glück so hefftig heuchelt /
Dn verdienst / so lieblich schmechelt.
Der zu Trier Bischoff ist /
Von Coln / wenn thus wissent bist /
Von wem in Komensolche Gaben /
Allein von glück sie sind erhaben.
Wie denn von Saxon das alt Geschlecht /
Von Beiern die herrn verfestus recht.
Zwey gewaltiger Hertzogthumb /
Von Tugent brumpt / erlich from.
Noch hat das glück bey in gethan /
Wird bleiben weil die welt wird stan.
Das glück / das hat sein eigen sin /
Obs schon zuweiln gehet vberhin.
Die fromen / vnd tughafftig sein /
Vnd in verspricht / ja oder nein.
Darumb auch niemand zornen sol /
Die Fray die weis jr zeit gantz wol.
Das irig mag sie teilen mit /
Mehr der sie schilt / denn der sie bit.
Denn die menschen all inn gemein /
Zur arbeit all geboren sein.

Zu besitzen

Zubsitzen grosse Reichthumb nit /
Mein Fraw / theil ins denn sunder nit .
Vnd so wir sollen erlich sterbn /
Durch tugent solln wir erwerben /
Vnser künfftiges Vaterland /
Das vns zuuerlassen thue nicht ant.
Das vnser hertz nicht werd gbunden /
Jnn gut wird selten tugent fundn .
Das der Philosophus bedacht /
Von Thebys Reichthumb sehr veracht.
Auff das sein gmüt nicht würd bekrenckt /
Ein gros gewicht Golts / jnns Meer senckt.
Dazu so find wir jnn der schrift /
Reichthumb / zufliehen wie das gifft.
Wie die distel / sage ich / drot /
Wie vns Gott denn gepoten hat.
Welchs auch sein Discipel wol bdacht /
Armut speis sie genügend macht.
Welches auch Sanct Jeronimus /
Der Narung nach kein vberflus.
Jnn Gott erleucht fast hochgelert /
Das glück darümb nicht sehr fast ert.
Allein er folget Christo noch /
Was zergenclich er fast versproch .
So hat Anthonius Abt das glück /
Geworffen allweg stetz zuruck.
Was jm von jr verlihen war /
Achtet er zwar nicht vmb ein har.
Wo wir mit sinnen möchten lebn /
Solt wir das glück frey vbergeben .

E Vnd

Vnd vns glücks feindschafft lieber sein /
Dein freundschaft / glaub furwar ich mein
Nach dem es sehr verhindern ist /
Das Rechte gut zu aller frist .
Ein Raben weis ich lieber sech /
Denn der mit warheit frölich gech .
Wil dienen Gott dem Herrn mein /
Vnd des glücks trewer Diener sein .
Doch das solches bey dir bleib /
Das ich der red zuviel nicht treib .
Das ich inn vngnad komen möcht /
Welchs fur mich gar nicht döcht .
Dastu zusehen lust mein Frawen /
So kom ich wil dichs lassen schawen .
Ich sprach / so fur mich zu jr hin /
Ob ich jr schon feindselig bin .
Als wir komen ein kleine rast /
Vegius / mich bey der hand fast .
Sprach / sich vmb dich zur rechten hand /
Alhie ist da Fraw glück want .
Alda sag ich viel seidne Zelt /
Zuzalen warns vmb kein gelt .
Mit köstlichen steinen warn gstickt /
Nach ordnung in einander gschicht .
Ein Königlicher stul inn mitten war /
Von schmarigt gemacht weis far .
Köstlich versetz inns Helffenbein /
Sagada / der Edel Stein .
Der von grüner Farb erglast /
Vnd sich an die schiff hencket fast .

Wirtis

Mirtites von gschmacke sus /
Pirides / der sich nie ansehen lis.
Calachias / der Eisel frar /
Ethides / den ein schlang gepar.
Iris / der im rotten Meer /
Gefunden wird hin vnd her.
Solchs zuerzelen wer zulang /
Mein hertz inn grossen freuden sprang.
Schoner kont Mans je nicht malen /
Solch Reichthumb kont die Welt nicht zaln.
Alda Fraw glück inn rhren sas /
Zwey Antitz helts inn schoner mas.
Zuweilen zornig / ein weil mild /
Ein weil sie lacht / ein weil sie schilt.
Die Kleider gülden wol gestickt /
Gros augen hets / sie sehr vmbblickt.
Den mehrer teil sie bschlossen wern /
Mit wachs verstopfft warn ir die Dren.
Wie denn die schiff leut all geparn /
Die vber den Sicilier Dollart farn.
Auch het sie inn irer rechten hand /
Den friden stab Mercurij genand.
Auch sassen ir zu rechten hand /
Herschafft / ehr / gunst / freud genand.
Wilfarung / lieb / freier / lacher /
Zirheit / scham / heyratmacher.
Nicht viel nidrer setzen Recht /
Khnem / gericht / frid vnd Edel gschlecht /
Lob gnad / vndholtseligkeit /
Wolgestalt / wird fröligkeit.

Cij Wird

Wird erhöhung / vnd gebreng /
Raub / hoffart vnd stoltz / nach der leng.
Freund vnd sipschafft / rachsals / Raub /
Hochfart / vnkeusch vnd stoltz / mit laub.
Zum füssen sassen als die Weid /
Reichthumb / barschafft / lieb on leid.
Mit vleis reekten sie auff ire Dren /
Der Königin gepot bfehl zu hören.
Im gras herunder stunden viel /
Mit himlitzten gemalte stül.
Darauff sassen sehr viel der geist /
Bleich durchsichtig / allermeist.
Ich sprach zu Vergio / mir beteut /
Wer sind allhie die Biderleut.
Die so ernstlich sehen thun /
Er sprach / Enea / verstestu nun.
Die finds. Die vnser Fraw glück /
Gros gemacht / viel oft vnd dick.
Die kurtz darnach der tod hat gnomen /
Wie du sigst / hie her sind komen.
Als gros einer / vorm andern war /
Je neher er mag sitzen dar.
Nach Tugent vnd furtreffligkeit /
Setzt man niemands / nim bescheid.
Der Erst der doch sitzet voren /
Ist Keiser Augustus geporn.
Geporn aus der Götter Geschlecht /
Der hat gebawt / verstestus recht.
Die gülden Welt / vnd hat erweit /
Das Keiserthumb / zu seiner zeit.

Über

Uber Garamenten / Indier /
Alexander / ist der Andr Herr.
Darnach sitzt Julius Cesar /
Scipio / der ein Römer war.
Pompens / sitzt von stund darnach /
Dambal / mit einem aug.
Sich dort Fabium Maximum /
Darnach Emilium Paulum.
Marcellus / Albiciades.
Dector / Darius / Olixes.
Priamus / vnd Agmenon /
Ninus / thun beieinander ston.
Constans / vnd Constantinus /
Valentiniannus / vnd Theodosius.
Die alten hab ich dir genent /
Du hast ja Keiser Sigmund kent /
Bey den noch einer dort thut ston /
Ist König Albrecht / sein dochterman.
Des nicht lang wert sein Regiment /
Das wider glück jns bald zertrent.
Dat seines stants nicht viel geacht /
Vom Hertzogen zum König macht.
Darnach er bald das Keiserthumb /
Empfing mit macht / vnd grossen rhum.
Dariner herst ein kleine zeit /
Drey jar / furwar ich dir betent.
Als schnell / er auch gewachsen war /
So schnell / so viel er wider thar.
Dieweil wir Ketten also zam /
Sach ich ein Man von kleinem stam.

E ij Mit

Mit schwarzem gſicht ein frölich Man /
Der viel Fraw glück vngestüm an.
Mit beiden henden in ire har /
Steh Fraw glück / mir offenbar .
Sprach er / du must gefangen sein /
Darumb so setz dich willig drein .
Meinem mut thu ich vertrauen /
Du must mich itzund bass anschawen.
Denn du mir fast bey zwelff jar
Zuwider gwest bist / offenbar .
Denn ich dir wil das har ansrauffen /
Flegst du mich? vnd thust lauffen .
Zu den verzagten gsellest dich /
Wie mustu bleiben verstedu mich.
Fraw glück die sprach ich beken /
Dich furbas allweg glückhafft nen.
Dieweil solch freuel du hast gewagt /
So frey / frisch vnd vnuerzagt .
So gib dich nur inn freibe Krieg /
Du solst auch furbas haben sig.
Ich fragt wer ist / der sich also regt /
Vnd freuel an Frawen glück legt .
Er sprach der Herr inn der Kron /
Ist der König von Arrogon.
Alfonfus heist der name sein /
Der mit all sein Brüdern neun,
Bey Scancia wurd gefangen /
Ist dem allein wider entgangen.
Wiewol er da legt ein blossen /
Ward doch wider ledig gelossen .

Wil

Wil wider wagen da sein leben /
Dat sich inn newe krieg bgeben .
Der ander den du sihest nun /
Drey schrit von frawen glück stan .
Bey der frawen im rotten Mund /
Ist er Dertzog von Burgund .
Der ander der vor faulkeit kam /
Keden mag / das ist sein nam .
Von Meiland ist der Dertzog /
Der lang fraw glück ist zogen noch .
Wenn hat dein fraw in angelacht /
Wiewol sie sein nie hat gedacht .
Denn Er iren worten gut /
Gehorhet nicht aus rechten mund .
Das im bracht hat bösen stand /
Dat darumb als der minder land /
Er het jr auch noch viel mindere /
Wo nicht wert des zorn wort glinder .
Denn der durchs glück so freidig ist /
Joan Weida / wenn dus wissent bist .
Welchen scheid von vns der walt /
Von dem / dem Türcken ist erkalt .
Auch hertz vnd mut / ist gfallen hin /
Das Hunger land / hat des nicht gwin .
Der schwartz ist der Giskara /
Der König Cassla erhilt alda .
So ist der kalb / der Zisko weis /
Der Behem sect hilt er mit fleis .
Auch inn den hauffenich da fand /
Erber frawen / der ich nicht kand .
Bütlich

Billich sprach ich / Vegy hie?
Was bdeuten doch die Frawen die.
Vnd wer mog doch die Erste sein /
Die also stoltzlich tritt herein .
Vegius antwort mir behent /
Die Erst / die ist Venedig gnenet.
Der tugent lob ein werde stat /
Zu Belt vnd Glück / die schlüssel hat.
Die Ander Pruck / die Drit Kölen /
Die andern nacherkomen solln.
Darnach sichstu Nürenberck /
Strasburg / gleichet jr inn sterck.
Wien / sol je die letzte nicht sey /
Florentz / gleichet sich jr bey .
Wiewol sie itzt viel der jaren.
Vngnedig glück off hat erfarn.
Senis itzund mechtig sehr blüt /
Valentz / itzt inn betrogung wüt.
Vegy sprach: sich wie die gebern /
Dort hinden inn den gstürtzten schlern.
Stehn inn ein kreis bey einander /
Hinter Hercule / vnd Alexander.
Vegius sprach: auff deine red /
So zeige ich dir / Es sind Sted .
Die etwo gros vnd mechtig warn /
Zuprochen sehr vor viel der jarn.
Als denn das glück / allezeit wil /
Denn sie nimpt wider zeit noch zil.
Die grosse Stadt / so vngehewr /
An welcher sichst gebrochn gmerwer

Ist

Ist Cartago die werde Stat /
Der Römer gwalt sie glitten hat.
Babilon die sibestu frey /
Auff Eufrate steht jr gebew.
Auch Troia / die gröste heubtstat /
Die so viel vnruh gemacht hat.
Ich sag jr mehr inn ein getreng /
Wie das sie die nicht wollen meng.
Ach lieber? Vegi mich bericht /
Was mügen deuten diese gschicht.
Der vorder sprach er / ist Soldan /
Egipten / er sich nennen kan.
Der Türcks Keiser ist der ander /
Aus Parthia / der König sander.
Aus Affrica der König wert /
Vnd der dort mit dem hültzen schwerd.
On Armen vnd dem leibe blos /
Aus India der König gros.
Nu sich auff die lincken hand /
Da sassen doch auff dürrem sand.
Verspottung / Armut / vnd auch schmach /
Lestrung / sich tag / alter / rach.
Peinigung / gfencknus / hunger / schmertz /
Zenklassen / forcht / scham / vnd on schertz.
Was / neid / verzweinelung / Krieg / streit /
Teurung / vntrew / auff der erden weit.
Sterben / einot / schleg vnd sorge /
Zugleich all in einer forchte.
Ich fragt wes sind denn diese pein /
Oder wes mag diese wüstung sein.
Er sprach / hie wonen die im sand /
Die vor waren inn grossen stand.

D

Da

Da sie das glück hett anserkorn /
Vnd durch vngnad glücks wider verlorn.
Mehr sprach er / sich bit dich durch Gott /
Die Frawen / sichstu / die dort stat /
Auff sibben seulen fuset sie /
Solch wunder hastu gesehen nie.
Das ist gewesen die gülden Stat /
Rom / itzund stet inn vngenad.
Meiner Frawen sag ich dir war /
Vnd stet nicht mehr denn auff ein har
Der folget nach Capua / gewis /
Genna / Luna vnd Paris.
Siracusa / Pisa / sencken sich /
Inn Welschen Landen bis gewis.
Inn Deudschen Landen hats kein not /
Constantinopel / leid den tod.
Tracia / hat getruncken giff /
Die zeit alle ding seer betrifft.
Denn wenn ein ding wird vber spant /
So bricht es leichtlich allzuhand.
Als Veginus / also mit mir red /
Fraw glück mich auch gesehen het.
Mit zorn sie auch zu mir sprach /
Was suchstu hin? wem gestu nach.
Das du so frölich hie thust stan /
Wer hat dich heissen einher gan.
Ich sprach / ich bin hie vnbeant /
Vnd so ichs sagen sol. Niemand.
Ich hab dein Rönigreich bsehen thon /
Wil von stund wider nausse gan.
Aber ich bit vntertheniglich /
Wolst mich bescheiden gnediglich.

Auff

Auff mein begern / wie ich dir sag /
Sie antwort mir / wolan so frag .
Ich sprach / thu mich des bedenten /
Wie lang bistu gnedig den leutn .
Sie sprach / ich steh des inn kein zwang /
Doch / sag ich dir niemand lang .
Ich fragt : wie mag denn dein gnad /
Erworben werden one schad .
Sie sprach / das selbig sey dir gseid /
Allein mit vngestümigkeit .
Weiter : fragt ich sie mit gestalten
Wer mag dich denn am lengsten halten .
Sie sprach / ich halt dir viel zu gut /
Der mein anlauff widerstreben thut .
Zu fragen : war noch mein beger /
Wer ist dein widerwertigster .
Sie sprach / furwar nicht der mich jagt /
Sonder der vor mir verzagt .
Auch fragt ich weiter vnbesind /
Ob dich auch inand verachten kund .
Sie sprach / das kan man gwis wol thun /
Doch niemand . Denn ein weiser Man .
Ich fragt : wenn wirst mir gnedig sein /
Sie sagt / wenn ich dich Auff hierein .
Ich fragt wirstu mich beruffen .
Sie sagt / das wirstu selbst wol prüffn .
Noch eins wolt ich fragen frey /
Wer dir am angenembsten sey .
Sie sprach / ich bericht dich viel zuviel /
Auff dein frag ich dir sagen wil .
Der mich jagt . Nicht der mich fleucht /
Vnd der auch vor mein gwalt nit scheugt .

D ij Ich

Ich sprach / so sey gesegnet nu /
Derwider sey gesegnet du.
Vnd verzeich dich auch nicht zu sein /
Inn der zalle / der Diener mein.
Obs dir zuweil geht vberzweg /
Vnd dir nicht gib gantz gulde Berg.
Das dir die leut dienen on mein schadn /
Solchs kumpt als aus meinen gnaden.
Ich dancket jr mit hochster zier /
Gnedig war jr gestalt gegen mir.
Vegius sprach / wolauff es ist zeit /
Dieweil dir gluck so guten bscheid
Geben hat / so sey nu getrost /
Aus Armut gros / bist du erlost.
Vnd furt mich zu der Pforten thur /
Er ging hinein / ich blieb dafur.
Da sah ich ein grossen hauffen /
Mit grosser bgir her zu mir lauffen.
Vnd stunden also vmb mich her /
Vnd fragten mich der newen mehr.
Vnd den ich sagt mein gsicht mich macht /
Inn dem ich gantz wider erwacht.
Einerber gmüt ermess hie wol /
Was dieses doch bedeuten sol.
Das inn der welt kein Paradis /
Bestendig ist / das ist gewis.
Denn wem es geht inn sunden wol /
Der wird dort ewigs jamers vol.
Darumb acht nicht der bösen bracht /
Gewaltiglich strafft Gott jr macht.
Wenn sie dort komen fur gericht /
Da man gerechte vrteil spricht.

Kein

Kein böser ist so arges muts /
Er wirckt zu zeiten etwas guts /
Als Siluins der glerte man /
Jnn diesem Büchlen zeiget an.
So ist kein mensch so from vnd schlecht /
Der allenthalben sey gerecht.
Den bösen wird jr guts beland /
Mit glück / das Gott auff erden gant.
Vnd wird der fromen sunden büß /
So Gott hie mit leiden grüß.
Drumb ist der from gar oft betrübt /
Dabey die Welt jnn freud geübt.
Das böß / vnd guts / hab als sein lon /
Nichts vnvergolten bleibt bestan.
Auch mancher fromer vbels thet /
Den leiden helt jnn tugent stet.
Als man probirt das Silber fein /
Bewert vns Gott durch angst vnd pein.
Wenn bößlich kömpt gros zeitlich gut /
Gott hie dermassen meisten thut.
Als mancher Metzker on genad /
Sein vihe fast speiset zu dem tod.
Dein sach setz nicht auff zeitlich glück /
Es hat bey jm viel böser tück.
Bleibt nimmermehr on einem stant /
Vnd darumb wird es glück genant.
Man spricht / das dem sey glück beschert /
Dem wolgefelligs widerfert.
Dem vngewislich kömpt vnd stet /
Vnd umbher als ein Redlen geht.
Böß zeitlich ehr schmiltz wie der schne /
Darnach folgt ewig angst vnd weh.
Wiewol

Wiewol auff erd bis zu der zeit /
Viel guts / vnd böß sein lon erbeit.
So ist doch oft vnd viel erkent /
Das Gott fur gut / vnd bößer end /
Die Tugend preist / vnd boscheit schend.
Feilt solchs dem würcker inn der zeit /
Den Erben / wird es selten weit.
Wer das recht war vnd achtung nimpt /
Es find ein jder was jm zimpt.
Die oder dort inn jener Welt /
Solchs hat kein menschen nie gfeilt.
Vnd wes wir drin haben sorg /
Wert fromer art / vnd bößer sorg /
Wer das nicht gantzen glauben hett /
Sehe wie oft bößes gut vergehet.
Viel Erben / man inn armut kent /
Wöcht heßig sein / ob ich sie nent.
Merckt all Historij / alt vnd new /
Zuletzt hat boscheit galgen New.
Wer grosser laster nicht enbiert.
Des schand vnd straff vntöblich wird /
Der damit nie gesehen hat /
Das Gott den fromen lis inn not /
Nach seinem samensuchen brod.
Vnd Christus sagt mit worten schlecht /
Sucht Gottes Reich / vnd seine Recht /
All ding jr zu euch fallen secht.
Solt solche warheit nicht bestehn /
Ehe / erd / vnd himel müß zergehen.
Vnd wer der aller größe spot /
Sonst jmand glauben mehr denn Gott.
Wer

Wer inn den menschen hofft zuweit /
Wird inn der schrift vermaledeit.
Merckt / allen Weisen ist es kund /
Vnd setzen drauff iren grund.
I wircken tugent solcher weis /
o darumb folgt kein lon noch preis.
Das tugent dennoch wird geübt /
Auch ob die stund / stend vnbetrübt.
Ob hie jr widerstand ist gros /
Das er wirckt tugent rechter mass.
So find er darumb ewig lan /
Bey Gott im seinem höchsten tron.
Wenn tugent blüt hie inn der not.
Als inn dem hag die Röslen rot.
Vnd stet jr prob inn festem mut /
Als feines Golt inn fewers glud.
Vns bleibt auch nichts nach diesem dantz.
Denn gut gerücht / der Ehren krantz.
Vnd das auch lebt nach vnserm tod /
Dazu hilff vns O Herr vnd Gott.
Das vns soleh glück nicht bring inn not /
Vnd vor dir sten inn schand vnd spot.
Davor vns behüt O lieber Herr /
Dir sey allzeit lob preis vnd Ehr.

Es ist allun.

H. D.

Das ist ein ...
...
...

...
...
...

...
...
...

...
...
...

...
...
...

...
...
...

...
...
...

...
...
...

...
...
...







AB 44 ^{9/} 13

ULB Halle


3

002 189 143




131.





152
15
15





3.

Aeneas Silvius :
darnach Papsst Pius Secun-
dus genand / Der gelerts al-
ler Bepst / sagt von Frawen gluck / Wie sie
manchen vnuerdienten menschen / so
bald als den besten erhöhet / inn
Deudsch Keim gefast
durch

Georgen Wotschidler.

Das Papsstum gwislich manche jar /
Gesundigt hat gantz offenbar.
Vider Gott / vnd sein heilig wort /
Darans gefolgt so manich mord.
Dem glück es wol gefallen hat /
Nu stet es auff dem letzten grad.
Befert sichs nicht / vnd thut bald bus /
Ewig es gwis verderben mus.

17.

